

# Tauge jatuh lantai dibungkus semula

DBKL serbu empat premis beroperasi dalam keadaan menjijikkan

Oleh **NORAFIZA JAAFAR**  
**KUALA LUMPUR**

**D**ewan Bandaraya Kuala Lumpur (DBKL) menyerbu dua pusat sembelihan ayam dan dua premis memproses tauge yang dikesan beroperasi dalam keadaan kotor dan menjijikkan.

DBKL memaklumkan, operasi tersebut dijalankan oleh Jabatan Kesihatan dan Alam Sekitar, Jabatan Penguatkuasaan serta Jabatan Pelesenan dan

Pembangunan Perniagaan di kompleks Pasar Borong, Pusat Bandar Utara di sini.

Menurutnya, sebanyak tiga buah premis dikenakan penutupan segera di bawah Akta Makanan 1983 dan sebuah premis akan dibatalkan lesen dalam operasi bersepadu itu.

“Siasatan di premis memproses tauge mendapati premis dalam keadaan kotor, bekas yang berisi tauge terdedah dan mudah dilalui oleh tikus.

“Pekerja mengutip semula tauge-tauge yang telah jatuh ke lantai dan dibungkus semula,” katanya menerusi perkongsian di Facebook.

DBKL menambah, sebanyak 16 kompaun kesalahan telah dikeluarkan di bawah peruntukan UUK Pelesenan Petempatan

**Mahkamah & Jenayah**

Makanan (WPKL) 2016, UUK Pelesenan Tred, Perniagaan Dan Perindustrian

(WPKL) 2016 dan Akta Jalan, Parit Dan Bangunan 1974.

“Antara kesalahan lain adalah semua sisa ayam seperti bulu ayam dan darah ayam terus dibuang ke longkang awam.

“Hasil siasatan Indah Water Konsortium (IWK) didapati loji berhampiran dipenuhi oleh bulu ayam dan lemak ayam.

“Pekerja premis juga didapati tiada suntikan typhoid serta tidak memakai pakaian bersih dan sesuai ketika untuk mengendalikan bahan mentah,” katanya.

DBKL mengingatkan semua pemilik premis sentiasa menjaga kebersihan dan mematuhi undang-undang ditetapkan dalam syarat lesen perniagaan.



Premis memproses tauge beroperasi dalam keadaan kotor.